




春秋取義測 卷之十一

膠州法坤宏



定公

元年春王三月



元年春不書正月無事也隱莊元年之正月皆無事而書正月以正隱莊之不即位也若定之元年正月昭公之喪未歸定公之位未定無其事史故闕其文也春秋之修因闕文以見義凡先君薨嗣君立殯而即位常禮也春秋於羣公皆不書而定公特書之改元之正月為人君朝

正之始月大事也春秋於羣公皆書即不行即位之禮者亦書而定公特不書主人習其讀而問其傳可以知罪之在

晉人執宋仲幾于京師

王者所居稱京師宋仲幾以城成周執所謂京師成周也時王城為朝黨所據王入于成周正其名曰京師乃撥亂返正之義

夏六月癸亥公之喪至自乾侯戊辰公即位
殯而即位也定正月未得即位六月癸亥公之喪至自乾侯戊辰乃即位特書日以志變禮王

克撥曰殯而即位與正月即位是兩禮此禮亦十二公所同孔子不錄他公而獨錄定公所謂以書不書見義也

秋七月癸巳葬我君昭公○九月大雩○立煬宮
煬公考公之弟弟繼兄立故季氏援以為典立煬宮季氏志也

冬十月隕霜殺菽

穀梁未可以殺而殺舉重可以殺而不殺舉輕其曰殺菽舉重也

二年春王正月○夏五月壬辰雉門及兩觀災

雉門兩觀魯朝廟制也因災變著錄之
秋楚人伐吳

書楚人伐吳吳與同盟故也吳見伐之有關中國晉人啟之也自晉通吳以制楚而吳楚構禍見于春秋楚七伐吳吳終入楚遂與晉爭伯主盟黃池春秋備書之

冬十月新作雉門及兩觀

宮廟災未有不新作者新舊不書特書新作譏新作也雉門即僖新作之南門遇變而不知革又重新之仍僭也書作以見不當作也

三年春王正月公如晉至河乃復

晉政多門志不在諸侯故來朝者多以故辭

二月辛卯邾子穿卒○夏四月○秋葬邾莊公○

冬仲孫何忌及邾子盟于拔

四年春王二月癸巳陳侯吳卒○三月公會劉子

晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚

討王子朝也王室之亂朝奔楚故劉子主為此會大司馬九伐之法曰負固不服則侵之大書

侵以正王事

夏四月庚辰蔡公孫姓帥師滅沈以沈子嘉歸殺之

侵楚而滅其與國譏遷戮也

五月公及諸侯盟于皐鼬

會召陵之諸侯也稱諸侯前日後凡時蔡楚構難諸侯為是盟皐鼬以謀之書公及明非晉主

據僖九年諸侯盟于葵丘不書公及

杞伯成卒于會○六月葬陳惠公○許遷于容城

○秋七月公至自會○劉卷卒

本劉子會諸侯而終言之以會卒也

葬杞悼公○楚人圍蔡○晉士鞅衛孔圉帥師伐

鮮虞○葬劉文公

王臣之卒葬不志特書葬劉文公錄王事也召

陵之會劉子一呼同時應者十有八國桓文之

合諸侯未有若此之盛者于以見人不忘周而

天下之大可為劉卷卒西周因以不復傷王事

之有闕特錄而葬之

冬十有一月庚午蔡侯以吳子及楚人戰于柏舉

楚師敗績楚囊瓦出奔鄭

楚人圍蔡同盟諸侯環視而莫之救蔡乃以吳師敗楚入郢譏中國之不能蠻夷所由進也楚敗而吳張中諸侯悉受其憑陵春秋特筆之

庚辰吳入郢

郢楚之國都敗其師入其都吳寔強也敗楚稱子錄其君也入郢稱吳一役而再有事從其恒稱史略詞

五年春王三月辛亥朔日有食之○夏歸粟于蔡臯鼬之盟故也盟臯鼬以謀蔡楚人圍蔡不能救相與歸粟焉獨言我歸者明諸侯之自相歸

無伯之詞也

於越入吳

越人來告也吳入郢越入吳晉既失伯楚亦寔衰南北之從漫無所歸一而吳越進矣春秋所以書也

六月丙申季孫意如卒

意如之卒無譏詞季孫逐君而定受其位不譏意如歸其責于定公

秋七月壬子叔孫不敢卒○冬晉士鞅帥師圍鮮虞

六年春王正月癸亥鄭游速帥師滅許以許男斯歸

于宋之役許鄭同與會盟大書鄭滅許譏南北皆失伯權中諸侯自相滅亡

二月公侵鄭

陪臣執國命也季氏舍中軍民不在公公不得為政意如卒陽虎專國侵鄭之役假公命以出師不言肅者陪臣微賤名不登于史策

公至自侵鄭○夏季孫斯仲孫何忌如晉

獻鄭俘也斯忌並使命不專季孫也時陪臣執

國命二卿皆為肅所使

秋晉人執宋行人樂祁犁

晉政多門諸侯大夫各有所主祁犁主趙氏故

范氏執之李庶曰此為晉三卿內叛之始亦宋

叛伯之始

冬城中城○季孫斯仲孫何忌帥師圍鄆

斯忌並帥政不專季孫也鄆前潰入齊齊人歸

鄆陽關陽肅居之以為政鄆不服故二卿帥師

圍鄆書法與斯忌如晉正同

七年春王正月○夏四月○秋齊侯鄭伯盟于鹹

鄭叛晉也諸侯特相盟天下之無伯也五伯衰
七雄出春秋變而為戰國生民之禍烈矣無伯
天下之大故也○陳傅良曰特相盟自齊桓以
來未之有也於是再見是故石門志諸侯之合
于鹹志諸侯之散

晉人執衛行人北宮結以侵衛齊侯衛侯盟于沙
衛叛晉也

大雩○齊國夏帥師伐我西鄙

鄆故也

九月大雩○冬十月

八年春王正月公侵齊公至自侵齊○二月公侵
齊

報國夏之伐也陽虎擅命出師而兩侵齊皆書
公乃史文記事體例春秋特筆之直若歸命于
公者此欲赴公山以魯為東周之義

三月公至自侵齊○曹伯露卒○夏齊國夏帥師
伐我西鄙公會晉師于瓦公至自瓦

于瓦之師救我也公會晉師于瓦公至自瓦未
來救也時三卿並帥羔雁分張齊師言伐而晉
師不言救師原不以救名也此春秋書會晉師

于瓦之義

秋七月戊辰陳侯柳卒○晉士鞅帥師侵鄭遂侵衛

頻書士鞅帥師趙鞅帥師政在大夫也為下三卿叛起文

葬曹靖公○九月葬陳懷公○季孫斯仲孫何忌帥師侵衛

晉令也時惟魯從晉故為晉侵衛

冬衛侯鄭伯盟于曲濮

結叛晉也

從祀先公盜竊寶玉大弓

昭公始從祀於廟也意如逐昭公客死于外不得以時歸葬從祀之禮闕如意如卒陽虎專命不順三桓之所為至是從祀先公竊寶玉大弓而有之盜謂陽虎孔子以從祀禮也而盜竊則亂也因盜竊之變常見祀禮之及正特筆之

九年春王正月○夏四月戊申鄭伯蠆卒○得寶玉大弓

寶玉大弓先公分器國之事守也故失之書得之書得謂得之陽虎虎奪季孫而歸于公自虎

言之謂之竊自國言之謂之得春秋因盜發而著明之錄其得乃以昭其失公羊子所謂微詞也

六月葬鄭獻公○秋齊侯衛侯次于五氏

比書次義繫于次也窺晉也志齊景圖伯也

秦伯卒○冬葬秦哀公

十年春王三月及齊平

齊魯連歲構兵至是始平書於經者釋怨安民本是善事

夏公會齊侯于夾谷公至自夾谷

書會不書盟無盟事也是會也孔子為相

晉趙鞅帥師圍衛

時衛叛晉與齊合

齊人來歸鄆謹龜陰田

平故也書來歸齊人服義而歸也三田齊取之我者夾谷之會晏嬰勸齊侯歸田以謝過

叔孫州仇仲孫何忌帥師圍郕

家臣叛也據傳侯犯以郕叛經不書非國事也不書叛而書圍以為必當有受其罪者此春秋治陪臣之法

秋叔孫州仇仲孫何忌帥師圍郕

再書圍郕家臣強也

宋樂大心出奔曹宋公子地出奔陳○冬齊侯衛侯鄭游速會于安甫

齊景主會也

叔孫州仇如齊

郕故也郕叔孫私邑叛入于齊齊人致之

宋公之弟辰暨仲佗石彊出奔陳

特書暨罪暨之者也辰以公子地故而自絕于兄又暨仲佗石彊與之偕奔佗彊身為卿佐有

君不事而暨辰出奔皆罪也弟不弟臣不臣直

書而義自見

十有一年春宋公之弟辰及仲佗石彊公子地自

陳入于蕭以叛

辰叛矣仍書宋公之弟何辰以弟故責望于兄是以弟叛也義繫于弟故重以弟書

夏四月○秋宋樂大心自曹入于蕭

晉齊伯國也魯宗國也宋王者之後也時六卿擅晉田氏竊齊三家專魯宋則連年大臣內亂誅殺奔叛不絕書春秋詳志之示政逮于大夫

之明鑒

冬及鄭平叔還如鄭莅盟

及鄭平始叛晉也陳傅良曰書輸平以志諸侯之合書及鄭平以志諸侯之散此春秋之所以始終也

十有二年春薛伯定卒○夏葬薛襄公○叔孫州

仇帥師墮郈

時邑宰數叛三卿患之仲由為季氏宰建議墮都故叔孫首帥師墮郈

衛公孟彊帥師伐曹○季孫斯仲孫何忌帥師墮

費

案公羊孔子行乎季孫三月不違曰家不藏甲邑無百雉之城于是墮郈墮費

秋大雩○冬十月癸亥公會齊侯于黃

齊景主盟也隱六年盟于艾齊魯為盟之始此年盟于黃齊魯為盟之終

十有一月丙寅朔日有食之○公至自黃○十有二月公圍成公至自圍成

書圍不書墮弗墮也書至自圍成成服也○王室亂而劉子有名陵之會家臣叛而孔子有三

都之墮此大有為之兆也兆足以行矣而不行
吾道窮矣春秋所以終於獲麟

十有三年春齊侯衛侯次于垂葭

伐晉河內

夏築蛇淵囿○大蒐于比蒲○衛公孟彊帥師伐
曹○秋晉趙鞅入于晉陽以叛

高閔曰鞅入晉陽以拒范中行而不知投鼠忌
器之義故聖人直名曰叛以著其不由君命專
土興兵之罪

冬晉荀寅士吉射入于朝歌以叛晉趙鞅歸于晉

趙鞅以地正國律以忌器之義罪無所逃故書
叛之文與荀寅士吉射一施之鞅歸不書復與
元咺孫林父異詞者君與其歸也

薛弒其君比

十有四年春衛公蒯戍來奔衛趙陽出奔宋

公蒯戍將去夫人之黨夫人訴之衛侯逐戍與
其黨家鉉翁曰書三大夫之奔著衛亂所從始
二月辛巳楚公子結陳公孫佗人帥師滅頓以頓
子牂歸○夏衛北宮結來奔○五月於越敗吳于
檣李吳子光卒

經書於越敗吳入吳事甚詳而吳伐越僅一見
至棲越于會稽則不書蓋吳光以戰卒復讎之
師不可以已故特以不書見義

公會齊侯衛侯于牽公至自會

頻書齊景主內外盟會成乎伯也

秋齊侯宋公會于洮○天王使石尚來歸脤

天王歸脤諸侯常禮耳何以書此春秋之終也
時王室益以微諸侯益以無王朝聘會盟之事
無一可書天子之在者惟祭與號孔子以歸脤
今福諸侯乃王者事神治民之大端於終事特

書之自石尚歸脤後王室之志不復見于經

衛世子蒯聵出奔宋

貴戚無去國之義書世子出奔蒯聵叛父之罪
著矣

衛公子孟彊出奔鄭○宋公之弟辰自蕭來奔

鄭伯克段不稱弟正名為賊也辰猶稱宋公之
弟者宋未嘗絕其屬籍史乃從文告而書春秋
筆之著其以弟叛兄之罪

大蒐于比蒲邾子來會公

昭定之世蒐五見于紅不書大譏季孫之私也

于比蒲昌間四書大不與季孫之私也歸政于公也時中軍已舍公無民何有蒐邾子為會蒐而來書曰會公存公也亦志而晦之義

城莒父及霄

十有五年春王正月邾子來朝○麇鼠食郊牛牛死改卜牛○二月辛丑楚子滅胡以胡子豹歸

胡頓皆會于召陵者特志其滅同盟之義也

夏五月辛亥郊

此以非時書

壬申公薨于高寢○鄭罕達帥師伐宋○齊侯衛

侯次于渠蔭

謀救宋也不書救非救也合謀以窺晉也

邾子來奔喪

邾子屈服于魯蒐來會正來朝喪來奔終于國破身執恭而無禮不能遠恥辱之效春秋詳書之以示誠

秋七月壬申妣氏卒

哀公之母也

八月庚辰朔日有食之○九月滕子來會葬時益以無王羣侯交邦之禮悉廢晉齊楚之喪

卷十一
葬魯君嘗躬往焉今邾滕二君來奔喪會葬春秋備書之

丁巳葬我君定公雨不克葬戊午日下昃乃克葬處事有常變未可執一先王治葬先事有小臨時有宜禮以制其常義以通其變權乎常變之宜亦存乎仁人孝子之誠敬何如矣春秋兩書雨不克葬不期以日時期于克葬因事變示教義不以緩亟為譏

辛巳葬定如

哀公立未踰年不及尊奉其母故卒稱如氏葬

稱定如史文也春秋筆之明僖公成風宣公敬嬴之稱夫人皆非所宜書其正以見其不正焉○王克揆云庶子為君為其母無服葬非所錄也哀公雖未及尊崇其母而魯之尊崇所生已成故事故史錄其葬而春秋特筆之以明非禮不以子為君則妾母得卒之葬之如公羊氏母以子貴之說

冬城漆

春秋取義測卷之十二

膠州法坤宏

哀公

元年春王正月公即位○楚子陳侯隨侯許男圍蔡

報柏舉也蔡於是乎請遷于吳○蔡吳與也此
年楚圍蔡陳楚與也六年吳伐陳陳蔡皆先王
封國嘗與中夏會盟時無王伯困于蠻夷而莫
之郵故其見圍見伐春秋備志之

躡鼠食郊牛改卜牛夏四月辛巳郊○秋齊侯衛

侯伐晉

列書齊衛伐晉伯統亡矣○陳傅良曰春秋之初諸侯無王者齊鄭宋魯衛為之也春秋之季諸侯無伯者亦齊鄭宋魯衛為之也

冬仲孫何忌帥師伐邾

哀公之編魯君臣伐邾圍邾凡五見而終於入邾以邾子益來宋君臣伐曹圍曹凡三見而終於入曹以曹伯陽歸時無王伯諸侯受兵禍不可勝書書其甚者

二年春王二月季孫斯叔孫州仇仲孫何忌帥師

伐邾取濼東田及沂西田癸巳叔孫州仇仲孫何忌及邾子盟于句繹

以邾事魯之謹而再伐其國疊取其田既要之盟後復圍入焉自是內外之盟皆不書以為不足書也

夏四月丙子衛侯元卒○滕子來朝○晉趙鞅帥師納衛世子蒯瞶于戚

書納不宜納也蒯瞶稱世子明非父之絕其子乃子之自絕于父春秋書世子蒯瞶出奔於靈公未卒之前而書晉趙鞅納世子蒯瞶於靈公

既卒之後罪蒯聵之義自見書于戚明未得入國

秋八月甲戌晉趙鞅帥師及鄭罕達帥師戰于鐵鄭師敗績

列書晉趙鞅帥師及鄭罕達帥師戰夷晉于鄭也時鄭叛晉與衛睦故救衛而與晉戰

冬十月葬衛靈公

蒯聵在戚而靈公書葬衛有君矣衛人廢聵立輒非嗣立之常春秋書衛人立晉何以于輒立無譏詞曰此春秋所以討聵也晉疑于嗣立故

書立若輒者本無立道春秋治其父弗及治其子也

十有一月蔡遷于州來蔡殺其大夫公子馮

蔡服于吳也于是吳方強盛楚圍蔡蔡請遷于吳蔡殺其大夫公子馮遷故也州來吳邑

三年春齊國夏衛石曼姑帥師圍戚

討蒯聵也聵以子叛父春秋大書齊國夏衛石曼姑帥師圍戚如圍宋彭城之例明內外臣民皆義所得討予其討也然則春秋胡弗治輒也曰衛之臣民義得討聵不得立輒討聵公法也

治也立輒私情也亂也春秋之法治治而不治
亂書齊衛圍戚而不書衛人立輒乃不治而治
之義○春秋無外諸侯自圍其邑之文惟宋圍
彭城衛圍戚兩見之一以討亂臣一以討賊子
此乃比事之教

夏四月甲午地震○五月辛卯桓宮僖宮災

雉門兩觀災書及延及之也桓宮僖宮不書及
同日並災也祖廟親盡則毀三家出于桓立于
僖故其宮獨不毀春秋因災變著錄之以示誠
季孫斯叔孫州仇帥師城啟陽○宋樂髡帥師伐

曹○秋七月丙子季孫斯卒○蔡人放其大夫公
孫獵于吳

亦遷故也馬與獵皆不樂遷吳者殺之放之乃
以說于吳

冬十月癸卯秦伯卒○叔孫州仇仲孫何忌帥師
圍邾

四年春王二月庚戌盜殺蔡侯申

蔡人不安于遷故亂作盜即微者辟稱人故云
盜

蔡公孫辰出奔吳

懼罪而出也

葬秦惠公○宋人執小邾子○夏蔡殺其大夫公孫姓公孫霍

頻書放殺而不去其官明不以其罪

晉人執戎蠻子赤歸于楚

書晉人執戎蠻子赤歸于楚辟伯晉而京師楚也然則春秋亦崇伯乎曰伯即古者方伯之稱春秋之作以存王迹也帝降而王王降而伯五伯雖假之而諸侯猶知有王無伯而會盟泐伐之遺風不可復問夫子所為岌岌乎

城西郭○六月辛丑亳社災

亳社社之在亳者亡國之社存以示殷鑒志其災書法同成周宣榭火

秋八月甲寅滕子結卒○冬十有二月葬蔡昭公蔡制于蠻夷而君臣受其禍無所歸責討賊之義至是而窮故昭公書葬

葬滕頃公

五年春城毗○夏齊侯伐宋

伯事也宋人伐曹執小邾子齊侯為是伐宋所謂彼善於此者孔子猶錄之

晉趙鞅帥師伐衛○秋九月癸酉齊侯杵臼卒○冬叔還如齊閏月葬齊景公

閏月書葬義同定公之書而葬以克不克為義不以遲速為譏○王克掞曰喪事不數閏本謂喪服不闕葬禮葬事卜日以視遠近非謂閏月不可以葬也

六年春城邾瑕

邾瑕取之邾者魯有負瑕故稱邾瑕以別之如稱魯濟之類從史文也

晉趙鞅帥師伐鮮虞○吳伐陳

吳楚爭伯也陳從楚圍蔡故吳伐陳十年楚伐陳吳救之陳服于吳也

夏齊國夏及高張來奔

高國奔陳氏獨擅齊矣荀范叛三卿專據晉矣故弑君之事以陳乞終侵伐之事以趙魏終

叔還會吳于柤

吳寔主中國也晉通吳敝楚卒有黃池之爭魯好吳叛晉卒有萊門之辱不自強而藉外援鮮有不啟戎招侮者比事觀之可得其義

秋七月庚寅楚子軫卒○齊陽生入于齊齊陳乞

弒其君荼

初景公欲廢長立幼陳乞不從景公卒乞殺荼
逆陽生而立之正也正則於荼何以稱弒已受
命矣李廉曰廢立之際大臣當據經守正守死
不回然後可不然必陷于大惡里克陳乞事正
同

冬仲孫何忌帥師伐邾○宋向巢帥師伐曹

七年春宋臯瑗帥師侵鄭○晉魏曼多帥師侵衛

○公會吳于郟

比書會吳吳寢主中國也

秋公伐邾八月己酉入邾以邾子益來○宋人圍

曹○冬鄭駟弘帥師救曹

書宋伐曹侵鄭圍曹鄭救曹時無王伯中諸侯

自相救伐

八年春王正月宋公入曹以曹伯陽歸○吳伐我

吳圖伯故為邾伐我次于泗上取城下之盟而

還伐我不言鄙明其直造國都

夏齊人取讎及闡

直書入邾以益來吳伐我齊人取讎闡不為婉

詞者隱公入許不言許男奔外伐我譏亟變也

鄙齊歸鄆讎龜陰不言取

歸邾子益于邾

畏吳故也

秋七月○冬十有二月癸亥杞伯過卒○齊人歸
謹及闡

亦畏吳故也時吳圖伯治諸侯之相侵奪者

九年春王二月葬杞僖公○宋皇瑗帥師取鄭師
于雍丘

悉虜而俘之曰取觀左氏所載使有能者無死
以二人歸則殺人多矣春秋之末書取師者二
謝氏所謂著其禍之大者是也

夏楚人伐陳

陳即吳故也

秋宋公伐鄭○冬十月

十年春王二月邾子益來奔○公會吳伐齊
特書公會吳伐齊魯服于吳也

三月戊戌齊侯陽生卒○夏宋人伐鄭○晉趙鞅
帥師伐齊○五月公至自伐齊○葬齊悼公○衛
公孟彊自齊歸于衛○薛伯夷卒○秋葬薛惠公
○冬楚公子結帥師伐陳吳救陳

書鄭救曹志列國之無伯書吳救陳志中國之

無伯

十有一年春齊國書帥師伐我

古者天子守在四夷天子卑守在諸侯諸侯守在四鄰諸侯卑守在境內春秋大書吳伐我齊伐我戰于艾陵會于黃池譏中國皆亂四夷交侵先王禮樂征伐歸地無餘此匪風下泉微意也

夏陳袁頗出奔鄭○五月公會吳伐齊甲戌齊國書帥師及吳戰于艾陵齊師敗績獲齊國書

晉楚分伯而後南諸侯莫大于陳蔡吳遷蔡伐

陳而楚弗能爭北諸侯莫大于齊魯吳會魯伐齊而晉不敢問吳由是主中夏會黃池然則世運之升降治道之汙隆亦在乎人事爾後之君子知人之克勝乎天則知亂之可反為治矣

秋七月辛酉滕子虞母卒○冬十有一月葬滕隱

公○衛世叔齊出奔宋

春秋書內外大夫奔者凡六十九多在春秋之末其時政在大夫而以無道行之互相傾軋理勢所必然

十有二年春用田賦

初稅畝履畝而稅壞什一之法也殫民財也用
田賦計田加賦亂里廛之征也悉民力也

夏五月甲辰孟子卒

此昭公夫人取于吳謂之吳孟子者不稱夫人
不稱薨葬不以夫人之禮薨之葬之也義詳隱
二年子氏薨

公會吳于橐臯○秋公會衛侯宋皇瑗于鄆○宋
向巢帥師伐鄭○冬十有二月螽

十有三年春鄭罕達帥師取宋師于岳

四國圍戴鄭伯伐取為春秋書取之始雍丘于

岳宋鄭取師為春秋書取之終泓伐禍變於此
而亟

夏許男成卒○公會晉侯及吳子于黃池

書會書及別內外也列序諸侯而稱吳子吳主
中國也○會盟征伐王事也五伯假之春秋每
有取焉者以為雖假之諸侯猶知有王桓文沒
伯事衰矣然辰陵于申楚主盟而晉不與于宋
于弮楚大夫主會而晉君猶未與也今勾吳繼
伯南北諸侯皆為所臣服黃池之會晉與我魯
共奉為盟主王事終而伯事亦終嗣後會盟遂

不復志

楚公子申帥師伐陳

陳終服于吳也

於越入吳

吳既敗楚又主夏盟南北兩伯莫敢與爭焉然

吳方入郢而於越入吳矣方會黃池而於越又

入吳矣世衰道喪事變愈下而禍變亦愈亟春

秋備書之

秋公至自會○晉魏曼多帥師侵衛

春秋之末屢書趙魏帥師侵伐事以明其君不

在諸侯政出臣下此伯權所由壞晉國所由分

葬許元公

此鄭人所滅之許也卒之葬之復見於春秋之

終聖人於興滅繼絕蓋汲汲焉義詳僖二十一年部子來朝

九月螽○冬十有一月有星孛于東方

志天變也

盜殺陳夏區夫

志人禍也春秋之法微者窮諸人賤者窮諸盜

書盜殺蔡侯申書盜殺陳夏區夫國君卿大夫

而盜得殺之亂賊之黨窮於上下矣

十有二月螽

志異也九月螽十二月螽天災人禍至此已極
春秋所以絕筆

十有四年春西狩獲麟

此與鳳鳥河圖之歎同義顏淵死子曰噫天喪
予子路死子曰噫天祝予西狩獲麟子曰吾道
窮矣公羊傳深得經旨○孟子歷叙堯禹以來
治亂而終以孔子之作春秋已之闢邪說蓋綜
帝王師儒通古今上下而言之宰我知聖人以
為賢於堯舜韓愈稱孟子以為功不在禹下正

謂此爾然則春秋者千聖治術之統匯孟子者
百家學術之疏濬也孟子述孔子作春秋之說
曰其事則齊桓晉文其文則史其義則丘竊取
之矣其自為說曰春秋無義戰非精於義者誰
易與於斯今折衷諸家之說歸于孔孟為取義
測焉迂齋法坤宏識



臣

